

百四齡西峙公傳

公字西峙諱添華晚號蓮池蓮池者取周茂叔愛蓮之意以蓮生於池亭亭竦立出污泥而不染也少時志耽藝林涉獵詩古文辭通其大義而卒無心於仕進以爲嗜慾深則天機淺彼世之役情富貴終日皇皇百夏感其心萬事勞其形而不永其天年者不可枚舉是以怡志林皋飲食甘淡薄每當秋暇日間步田間不假杖履聽流泉泐泐聲以自娛蓋得莊子養生之術焉其爲人也木訥寡言笑凡事敦古道不尙紛華處家庭骨肉閒感以誠鄰里戚黨過從往來雖

歷久而不渝良由天性率真如是元配段繼配吳內
助均有賢淑聲生子五課讀外多務農爲業孫曾輩
亦蔚然繼起不失公忠厚傳家之道公生於康熙時
迨乾嘉間年彌高德彌邵精悍之氣見於眉睫時諸
男析居一日公早起健步如飛路逢人詢曰公何往
答曰吾兒今八十誕辰招客飲吾將赴讌故至今里
鄰嘖嘖猶傳爲佳話云嘉慶十四年邑之人以公壽
介百齡身歷四朝眼觀五代生平無一青掩大德爰
請之有司詳准題奏奉旨旌表給帑銀三十兩上用
緞一疋再加恩給銀十兩緞一疋欽賜昇平人瑞字

樣並勅建百歲坊行詳邑乘人皆以爲榮而公則若
固有之越四年公始卒葬何家灣六斗衝中坡坊建
於石門宸高丈餘豐碑屹屹過其下者莫不知陳氏
有百四齡翁孔子言曰惟仁者靜惟仁者壽公其仁
者與